

son total circuit, le soleil viendra, & puis Saturne. Car selon les signes celestes le regne de Saturne sera de retour, que le tout calculé, le mode s'approche, d'une anaragonique reuolutiō: & que de present que ceci i'escriptz auant cent & septante sept ans troys moys vnze iours, par pestilence, longue famine, & guerres, & plus par les inundations le monde entre cy & ce terme prefix, auant & apres par plusieurs foys, sera si diminué, & si peu de monde sera, que lon ne trouuera qui vueille prendre les champs, qui deuiendront liberes aussi longuement qu'ilz sont estés en seruitude: & ce quant au visible iugement celeste, que encores que nous soyons au septiesme nombre de mille qui paracheue le tout, nous approchant du huictiesme, ou est le firmamēt de la huictiesme sphere, que est en dimension latitudinaire, ou le grand Dieu eternal viendra paracheuer la reuolution: ou les images celestes retournerōt à se mouuoir, & le mouuement superieur qui nous rend la terre stable & ferme, *non inclinabitur in seculum seculi:* hors mis que quand son uoloir sera accompli, ce sera, mais non point aultrement: combien que par ambigues opinion